

Bonjorn, amigas e amics, e bona dintrada a totes. En esperar de novèlas vòstras, vos mandí lo rendut compte de l'AG de la FELCO que se tenguèt a Rodés aquest estiu. I apondí, amb mas desencusas per mon retard, mai que mai pròchi de M.C. Rixte que se faguèt segretària de sesilha, lo R.C. de l'AG de decembre de 2006... M'avisi que l'oblidèri, e ne soi desolada...

AG FELCO Rodez 19-07-07

Presentats :

APLR (Niça) : Mirelha Bonetto

CREO Aquitània : Marciau Peyrouny, Eric Astié

CREO Auvernha : Patric Bec, Bruno Duranton

CREO Lengadòc : Estela Lame, Melania Laupies, Felip Martel, Carina Maury, Claudina Paul, Miquèla Stenta, Maria Joana Verny

CREO Miegjorn-Pirenèus : Daidièr Agar, Xavièr Bach, Esteve Bordoncle, Olivèr Caponi, Sergi Carles, Joan Lois Cortial, Arno Krispin, Cristòl Larrocan, Ivon Puech, Maela Cloarec,

Burèu FELCO : Daidièr Agar, Felip Martel, Maria Joana Verny,

Desencusats :

- los CREOs de Granòble, Lemosin, la Talvèra
- Muriel Batbie, Patric Coffin, que venguèt mai tard dins la setmana per trabalhar amb nosautres sul collòqui FLAREP 2007, Yan Lespoux, X. Malby (pel burèu FELCO) que poguèt venir son que la velha, Alan Rainal (pel burèu FELCO)<sup>1</sup>, J.M. Espinassa, mèstre fialaire.

Maites collègas me faguèron saupre son impossibilitat de venir. Me desencusi a mon torn de mos oblits. A mon adreïça de vacanças ai pas tot çò que me caldriá...

**Òrdre del jorn establít en debuta de sesilha (tot fuguèt pas tractat, falta de temps...) :**

- Trabalh sus un projècte de proposicion de lèi per las lengas de França
- Convencions Estat / Regions : bilanç e perspectives
- Los pòstes als concorses (CAPES, CRPE especific)
- Las situacions de trabalh dels collègas, titularis e vacataris
- Los programas
- La question dels mejans especifics per l'ensenhament de l'occitan
- Foncionament FELCO

## 1- Lèi

Felip Martel rampèla :

- la posicion de Sarkozy, desfavorable a la ratificacion de la Carta Europenca, mai favorable (segon sos dires, cf. PJ) a una lèi per las lengas de França

<sup>1</sup> que passèt mas que li calguèt anar a un acamp amb la Region MP... çò que pausa un pb de comunicacion : los acamps FELCO son publicats largament a l'avança, las datas circulan e mai en defòra de l'associacion. Es domatge de se faire aital concurrència.

- lo trabalh endralhat a partir de 2005, mai que mai a l'iniciativa del malhum « Langues et Cultures de France » (<http://languesculturefrance.free.fr/>), entre l'IEO, la FELCO (la preséncia de Calandreta se redusiguèt a assistir al primièr acamp de trabalh a l'Assemblada Nacionala). Après un rescontre amb lo grop comunista (deputats e senators), se redigiguèt un tèxt per preparar una futura lèi, l'idèa (suggerida pels quitis comunistas) estent que la proposicion sia portada per d'elegits de mantun grop politic, per li donar lo maximum de chança d'arribar en debat. Lo trabalh començat s'arrestèt abans la fin de la legislatura precedenta, per de rasons diversas ; Pasmens lo tèxt existís, redigit inicialament per Felip Martel, amendat per E. Roux per l'IEO, e per mantun militant de la FELCO. Es un document de trabalh que lo poirem remetre d'actualitat. Aquel tèxt parla pas solament de l'ensenhament, parla tanben de l'estatut social de las lengas de França, e de totes los autres luòcs d'emplec d'aquestas. Tèxt diponible sul sit <http://languesculturefrance.free.fr/>

#### **Discussion :**

- Per que lo tèxt redigit faga pas paur, escafar la referéncia a son origina : un trabalh amb de responsables comunistas. Remarca de M.J.V. (secretària de sesilha) : se compren aquela necessitat pragmatica, d'autant mai que los quites elegits comunistas a l'origina del trabalh diguèron que lo sol biais d'arribar a una resulta èra d'aver una proposicion de lèi intergrop. Pasmens, es un pauc dur d'engolir qu'als comunistas, lor siá totjorn demandat d'amagar son apartenéncia politica...
- Es que fasèm un trabalh los Occitans solets, o es que trabalham amb las autras lengas de França ? E mai siam, per principi, la FELCO, favorables a un trabalh comun, nos avisam sovent de l'especificitat de nòstra situacion e de la dificultat, en defòra de questions tecnicas redusidas, de trobar un consensus amb las autras lengas de França. Las autras lengas an totas un espaci geografic e administratiu dirèctament lisible, çò que las mena sovent a de posicions diferentas de las nòstras... Lo tèxt que ne parlam, dins l'estat ont es a l'ora d'ara, a demandadas d'oradas de trabalh e de secretariat complicat per téner compte de las remarques dels unes e dels autres, qu'èran pasmens en nombre limitat... Qual gerirà lo trabalh s'associam mai de mond ? Se trabalham amb las autras lengas, quin interlocutor consensual entre totas aquestas ? La FLAREP, sul plan exclusiu de l'ensenhament public ? F. Martel rampèla que i aguèt en 2006 un rescontre a Paris de la FLAREP amb l'intergrop parlamentari « Lengas regionalas ». Dos projectes foguèron presentats : lo que ne parlam aquí e un projecte que los Alsacians ne son a l'iniciativa. La FLAREP, de son costat, sosten puslèu lo projecte « alsacian ».
- Dins l'encastre « Anem, Òc » amb las autras lengas de França : amb la capitada de sas duas manif, « Anem, Òc » a ganhada una cèrta credibilitat a rapòrt de las autras lengas, que ne cal aprofiechar. Sens illusion, de segur, e amb dins l'amira la tissa malurosa qu'an las autras lengas de sovent « oblidar » l'Estat per o esperar tot de las collectivitats. Per la FELCO, los tres escalons (Collectivitats, Estat, Euròpa) son de préner en compte. E lo trabalh amb los dos primièrs deu èsser articulat. Dos elements per aquò :
  - lo tèxt de la crida « Anem, Òc », qu'es consensual e que pren totes los elements en compte
  - lo document FELCO « Participer à la réflexion. Quelles compétences respectives Etat / Collectivités territoriales ? » Disponible sur demanda a [mjvb@wanadoo.fr](mailto:mjvb@wanadoo.fr)
- Es que trabalham la FELCO solets o dins l'encastre « Anem, Òc » ? Sembla que tot lo mond pense qu'es important de seguir la dinamica endralhada amb Anem, Òc. La FELCO pòt prepausar a « Anem, Òc », tre la dintrada, de començar lo trabalh previst. Cal pas tròp esperar. Per que siá eficaça, una accion se deu endralhar tre la debuta de la legislatura.
- Es que nos contentam dels deputats o es qu'escrivèm al psdt Sarkozy en li ramentam sos prepausses favorables a una Lèi ? Responsa : cal faire las duas causas.
- Quin calendèr de trabalh ? Ne caldria un que tenga compte tanben de las autras lengas. Quin biais de faire d'ara en dabans ?

**Pels deputats novèls, es prepausat de procedir en dos temps :**

- 1- pausar a totes los deputats recentament elegits una question simplassa : es que sètz favorables a una lei per las lengas de França ? Prepausacion de Sergi Carles que li demandi de pensar a la redaccion de la question de pausar
- 2- prepausar als deputats favorables lo tèxt redigit, qui lor poirà donar d'idèas.
- 3- se pausa la question de l'articulacion trabalh central de la FELCO (e de Anem, Òc), amb lo trabalh dels CREOs (+ AELOC e APLR). Segur que res val pas lo contact personal, al nom de las associacions representativas de segur, amb cada deputat. Lo « mailing » massiu a sos limits. Rai, mai i a d'endrechtes ont las associacions localas an un foncionament mai que redusit. Lo mandadís sistematic, a cada deputat, de corrièls de la FELCO, es pas estat improductiu, que podèm comptar, per la legislatura anteriora, un bon cinquantenat d'elegits (deputats o senators), que son intervinguts cada còp que la FELCO los sollicitava. Rai que las intervencions son mai fòrtas aquí ont una associacion sòcia, o un membre de la FELCO, presenta en persona lo tèxt d'aquesta. D'aquí la demanda del burèu als aderents presents : s'engatjar de seguir, a la dintrada, lo trabalh decidit « centralament » per d'intervencions regionalas o localas. Proposicion acceptada per los delegats dels CREOs, AELOC, APLR, que lor es demandat de téner regularament la FELCO al fial de tala o tala intervencion de deputat o autre elegit.

## 2- L'estat de las convencions Estat (Rectorat) / Regions e autras collectivitats

**Torn de taula de las situacions** : de convencions son en camin dins las tres regions

- Aquitània (amb un trabalh especific tanben dins los Pirenèus Atlantics),
- Lengadòc : se deuriá signar a la dintrada. Lo CREO a escrich al Rector per li demandar d'accelerar las causas, segon sos engatjaments en CALR.
- Miègjorn-Pirenèus : a l'iniciativa de la Region, fonciona un grop de trabalh Rectorat / Region qu'a elaborat un tèxt de projècte de convencion. Aquel tèxt es partit dins totes los departaments per tal que i ajan tanben de causas en ligason entre Educacion Nacionala et Conselhs Generals (cf. Pirenèus Atlantics).
- Blocatge endacòm mai : res en PACA (particularitat : una region e dos rectorats), refús de la Region Auvernha.
- D'apondre al torn de taula lo fracàs d'una demanda de convencion en Iscla de França (cf. *La Setmana*) : vòte minoritari malgrat l'acòrd dels grops verds, comunistas e UDF. Refús de l'UMP. Vòte partatjat dels socialistas, refús del psdt socialista de Region Huchon.

### Discussion :

Proposicion d'escriure a Fillon per li demandar de faire aplicar son tèxt « *Un enseignement des Langues Régionales sera organisé là où des conventions seront en usage* ». Refús de l'A.G. Es evident que Fillon a pensat son tèxt dins un esperit negatiu. Caldriá pas qu'aquò abotiguèsse a demesir encara mai çò qu'existís dins las Acadèmias ont lo trabalh de convencionament a pas començat.

La delegacion FELCO al gabinet de Darcos demandèt a aqueste de sollicitar sos Rectors per que metèsson en camin la reflexion aquí ont pas res es encara endralhat. De seguir... E de seguir tanben per cada associacion academica (CREOs, AELOC, APLR).

Quina accion de la FELCO per faire avançar las causas ? De seguir.

Dins l'AG, d'unes avián l'impression de blocatges grands aquí o alai. D'autres quichèron sus las avançadas recentas de l'occitanisme dins la societat (succès de las manifestacions, gasanh de seriós dels occitanistas per los partenaris de las autras lengas, escota novèla dels elegits (20 000 manifestants, aquò representa un potencial mai grand d'electors). I a 30 ans, diguèt un collèga, pensàvem que tot èra acabat ; ara, nos trobam dabans l'evidéncia d'una demanda sociala consequenta, de parents mai que mai. Los contactes avançan tanben amb los sindicats e amb las federacions de parents d'escolans (FCPE e PEEP).

Se diguèt tanben que los collègas, sul terren, avián besonh de projèctes positius per èsser pas descoratjats.

### 3- La situacion de trabalh dels ensenhaires

L'AG parlèt mai que mai dels problèmas del segond gra. Doas constatacions, que son de segur ligadas :

1- **fôrça collègas patisson de condicions de trabalh dificilas**, sus mantun establiment, amb de trajèctes penibles e fatigants, amb d'emplecs del temps dificils, amb la dificultat de s'implantar dins lo luòc de trabalh

2- **assistissèm a « l'abandon de pòste » de mantun collèga.**

Sus aquel segond punt, la discussion foguèt longa. Qualques elements :

- Aquela situacion « d'abandon de pòste » es pas especifica a l'occitan : quantes certificats de matèrias scientificas preferisson d'emplecs dins lo sector privat ?
- Aquela situacion es pas novèla : dempuèi la creacion del CAPES, avèm « perdut » cada annada de collègas que causissian d'ensenhar sa valéncia o de sortir de l'ensenhament.
- Pasmens, dins la penuria ont sèm ara, los « abandons » de pòstes abotisson a de catastrofes vertadièras. Es de mai en mai dificil d'assegurar lo seguit de l'ensenhament, e es impossible de lo desvolopar. Lo Ministre Darcos se privèt pas de faire remarcar a la delegacion FELCO del 27 de junh aquela paradòxa de l'abandon de pòstes pels certificats d'occitan. Rai, nòstra responsa foguèt que las condicions de trabalh o podian largament explicar... Quichèrem tanben sus l'abséncia d'estatut clar de las lengas regionalas e de lor ensenhament qu'es responsable de condicions d'exercici dificilas. **Empacha pas que la situacion nos metèt en dificultat.**
- L'occitanisme es dins una fasa de creacion d'emplecs fòra Educacion Nacionala, çò qu'es un signe positiu de bona santat. Pasmens, sèm, a l'ora d'ara, dins una penuria de cadres formats. Lo problèma foguèt pausat a l'AG de pòstes recentament creats per l'IEO, amb mantun candidat, e « preses » per de certificats d'occitan alara que d'unes candidats a aqueles pòstes èran al caumatge.

**Fòra AG**, aguèrem l'escasença, lo burèu FELCO, de nos « explicar » sus aquel punt amb d'unes responsables IEO.

**Demanda foguèt facha a l'IEO, associacion partenària de la FELCO, d'evitar, quand es possible, de recrutar de certificats d'occitan.**

**Arguments :**

- de recrutar qualqu'un qu'es sens emplec permet de crear un emplec nòu.
- un certificat d'occitan que se'n vai laissa lo vuege, estent que i a pas de mejans per provesir son pòste. Rai qu'aquò es de la responsabilitat del Ministèri, çò que la FELCO se privèt pas de dire a Darcos. Mai la situacion es aital, **e cal que los collègas, coma los responsables IEO, o sàpian. Cal que sàpian tanben que, se daissan son pòste, obligan los collègas de se lo repartir e donc contribuïsson a rendre la situacion d'aqueles que demòran sul terren encara mai dura.**
- poirem pas demandar de pòstes novèls al CAPES se los certificats contunhan de partir
- consequéncia segondària : lo nombre pichonèl de pòstes al CAPES es una empacha pel recrutament d'estudiants dins las Universitats, e donc, indirèctament, entreten la penuria dels cadres avenirors, que ne patiràn totas las estructures associativas, dont l'IEO.

**Qualques elements de discussion a l'AG :**

- l'AG remarquèt qu'aqueles situacions de « nomadisme » dels collègas èra tanben una consequéncia indirècta de **l'avançada reala del professionalisme de l'occitanisme** : sèm sortits d'un temps de militantisme exclusiu, amb

\*) de consequéncias largament positivas : un occitanisme creator d'emplecs,

\*) e d'efièches negatius : los collègas se sentisson pas « engatjats », per exemple, per la capitada a un concurs...

**Remarca pasmens** : en ganhar lo CAPES e lo CRPE especific, l'occitanisme a permés a de joves collègas d'obtenir una seguritat estatutària. Se pòt regretar que d'unas volguèsson a l'encòp lo burre (lo pòste assegurat) e l'argent del burre (la libertat de se'n anar en disponibilitat). D'autant mai que sèm dins una passa ont los 4 pòstes al CAPES an laissat sul bòrd de la rota de joves motivats e valents...e qu'aqueles joves, que volián ensenhar la lenga son per una part sens emplec, e pòdon pas préner lo pòste dels certificats que se'n van.

- **las condicions de trabalh dificilas dels collègas foguèron sotalinhadas mai d'un còp**, amb lo sentiment que los encargats de mission IPR avián pas totjorn l'escota sufisenta de las situacions individualas...

- **se parlèt, encara un còp, dels blocatges o sabotatges de la part de l'administracion**. F. Martel exprimiguèt, un còp de mai, la necessitat, per la FELCO, de bastir un « libre negre » de l'ensenhament de l'occitan per faire lo punt de totes los disfoncionaments e blocatges.

- Foguèt sotalinhada tanben la necessitat, **de la part dels collègas, de faire remontar sas dificultats pro d'ora**, a son CREO, a la FELCO, de s'adreçar pro d'ora als sindicats

#### **4- Autres punts : la plaça de l'occitan dins l'encastre de las esparnhas de pòstes de foncionaris ; los programas – la visibilitat institucionala de l'ensenhament**

Aqueles punts foguèron just evocats, falta de temps.

Se rampelèt la responsa negativa del Ministèri a la demanda, de la part de la delegacion FELCO, de mejans especifics per las lengas regionalas. Tot deuriá se faire a mejans constants.

La risca es donc granda, dins la perspectiva d'esparnhar 17 000 pòstes dins l'educacion Nacionala. Lo Ministèri amaga pas brica lo biais de faire per aquò : coma se pòt pas gaire tocar al nombre d'escolans dins las classas entièras, es sus l'orari setmanier de cada escolan que se poiràn faire d'esparnhas. E donc sus las opcions...

Se parlèt dels programas novèls pel primari, que fan positivament allusion a las lengas regionalas, amb l'ambiguitat non completament levada de la situacion d'aquestas a costat de las lengas estrangieras.

#### **5 – foncionament de la FELCO – Collòqui FLAREP**

- **las finanças de la FELCO** : las caissas son vuèjas. Cossí trobar d'argent ?

L'idèa d'un concèrt de sosten foguèt avançada. Pas cap de mal per trobar los musicians. Los dos presents dins la sala (JL Cortial de Fai Lum, e P. Bec del grop Traucatèrme) diguèron son accòrd, e fòra AG, aguèrem tanben l'accòrd d'Olivier Dailhut, del grop « Tres a cantar ». Lo problèma serà de l'organizacion del concèrt : ont ? quora ? cossí faire per qu'aquò rapòrte vertadièrament de sòuses ?

- **lo foncionament de la FELCO** : lo burèu vira plan, lo trabalh se fai, los dorsiers son seguits, çò que tot lo mond reconeis. Tot l'espaci d'òc es ara cobèrt d'associacions academicas representativas. La ligason entre la « direccion » e la basa dels ensenhaires se melhora de mai en mai. Lo burèu receup tot plen de corrièrs, d'associacions academicas o d'individus, qu'ensaja de tractar. Los collègas recebon de butletins reguliers. De mond nòus se son investits dins los CREOs (APLR, AELOC). Pasmens, seriá encara mestier de se partatjar encara mai lo trabalh.

- **Collòqui FLAREP 2007** : darrièra dimenjada d'octòbre, en Alsàcia. Demanda de voluntari, estent qu'es pas per faire de torisme, mai per representar la FELCO pròche de las autras lengas de França. Candidat : Arno Krispin. Autras candidaturas possiblas, estent que la FLAREP paga lo congrés a doas personas per associacion, e que los CREOs pòdon participar.

- **Collòqui FLAREP 2008** : se fariá a St Affrica, en coorganizacion CAPI'OC (de St Affrica) / CREO MP (accòrd del CA) / FELCO. Nos rescontrèrem fòra AG amb Patric Coffin. Remarcas d'aqueste :

Idèa retenguda : la màger part del congrés se fariá a St-Affrica, amb un jorn dins un luòc limitròf de l'Acadèmia de Montpelhièr : interès : faire veire l'interregionalitat e demandar de subvencions a las doas Regions.

Secretària de sesilha : MJ Verny, RC reelegit, amendat e completat per F. Martel.

---

**AG FELCO Montpelhièr, lo 25 de novembre de 2006**  
Rendut-còmpte de M-C Rixte, secretària de sesilha de 14 oras a 17 oras.

Presents :

D. Agar (Tolosa)  
C. Assémat (La Talvera)  
X. Bach (Ais-Marselha)  
J. S. Barria (clavaire + Bordèu)  
M. Bonetto (Niça)  
E. Ciampoli (Montpelhièr)  
J. C. Forêt (Montpelhièr)  
F. Martel (president, Montpelhièr)  
C. Maury (Montpelhièr)  
A. Rainal (Tolosa)  
M. C. Rixte (Grenòble)  
E. Thébon (Montpelhièr)

**M. J. Verny (secretària, Montpelhièr)**

L'O.J. es adoptat e lei apondons son discutits d'en primièr :

**M. J. Verny** prepausa que l'AG FELCO que se ten de costuma a la prima a Tolosa siegue remandada a l'*Estivada* de 2007, a Rodès. Prepausicion acceptada per l'AG.

**Question de M.C. Rixte** sus la pausicion de la FELCO rapòrt ai vacances fachas per d'unei retirats per tapar lei traucs de la manca de pòstes.

**Responsa sortida de la discutida** : la FELCO pòt pas dictar au monde çò que devon faire o pas. Totei lei cas personaus son diferents. Son una ilustracion de mai dei consequéncias perversas de la manca de pòstes ai concors e de la precaritat de l'ensenhament de l'occitan a totei lei nivèus. Podem sonque regretar lo recors ai vacataris e ai retirats, qu'es pas brica sindicalament correct. Mai es a l'encòp una question de subrevida de l'ensenhament e una question de deontologia rapòrt ais escolans, dins la passa onte siam.

**Lo president de la FELCO** escriurà au ministèri per pausar lo problèma e mostrar que l'argument que i auriá pron de pòstes per respondre a la demanda sociala tomba d'en per se, dau mai que l'ensenhament de l'òc es pas assegurat per lo CNED.

**Una empacha de mai** son lei frontièras entre leis acadèmias, per lo segondari, e lei departaments, per lo primari. Es gaireben impossible d'equilibrar segond lei besonhs e de permetre ais endrechs onte lo concors especiau es organizat de provesir d'ensenhaires a-n-aquelei onte i a ges de recrutament.

Fin finala, tot aquò entraïna una desafeccion sensibla deis estudis occitans a l'universitat. I a un monde entre lo discors oficiau ben intencionat e la realitat. Faudriá que dins cada rectorat se compregue que tot es ligat e que fau trabalhar sus la continuitat dau primari a l'universitat.

**Doas questions de C. Assémat**

**Q1 : Lo problèma** de la delegacion possibla a las regions per la certificacion dei competéncias ais examens.

**Çai-sota lo R-C de la responsa redigit per C. Assémat, ambé, en rotge, sei remarcas.**

« Rapòrt a la Convencion a signar entre Region(s) e Estat, li a pas cap de directives precisas que l'afar es tròp novèl. Nos cal contunhar a caminar e informar la FELCO. Ça que la, se pòt notar que l'òm sap pas tròp çò que cal entendre per « Estat ». Rectorats? Ministèris associats (educacion, cultura, agencament del territòri...)?

Ai notat de conselhs que nos son balhats :

- Coma avem recebuda una responsa del sénher North, seriá segurament una bona causa de li demandar ajuda (**vau preparar una letra**).

- Cal pas desmembrar qu'avèm atanben una « filièra » pedagogica qu'existís : l'Inspector General e los IA-IPR encargats de l'occitan dins los rectorats de l'airal occitan. Pòdon, benlèu, téner un ròtle e calriá soscar a los implicar sistematicament. (**l'IG es assabentat. Ai pas los noms de totes los Inspectors e los Rectorats d'afectacion per lor mandar l'informacion ; fau donc una crida per aver de precisions**).

**Lo president** rampela que, d'un biais generau, se fau mesfisar dau « tot-estat » coma dau « tot-region » dins aquel affaire.

**Q2 d'Assémat sus lo dangièr** de « contaminacion » de l'accepcion « langues d'oïl » dins lei documents oficials en vista de la particion de l'occitan en « langues d'oc » coma d'unei lo vodrián.

**Responsa de F. Martel** : Lo solet biais d'existar per lei dialectes d'oïl es de se destriar dau francès, mentre que per l'occitan, es lo contrari. Nos fau contunhar de bramar contra « les langues d'oc » cada còp que s'atròba. La FELCO mandarà una lètra au ministèri e a l'IG per leis alertar sus lei consequéncias dau refús d'inscripcion ais examens e per signalar de punts contestables que trobam dins la brocadura de l'ONISEP a l'intencion dei colegians de l'Acadèmia de Créteil.

## Rapòrt morau

Adoptat a l'unanimitat

Cf lo tèxte de F. Martel, en annèxe, seguit de 15' de discutida :

M. J. Verny fai la remarca generala que siam a l'ora d'ara dins una situacion « fòra –principis » après trenta ans de pojada regulara.

D. Agar recomanda la lectura de l'introduccion ai programas dei colègis sus lo siti EDUCOL. Es fòrça flaca, e fau faire de remarcas mentre qu'es encara d'emandar.

**Diversas intervencions per dire que se fau mesfisar de l'accepcion « occitan, langue de culture » que faguét se trufar d'unei disent « verlan, langue de culture », ò que remanda l'òc demest lei lengas mòrtas, ambé lo latin e lo grèc.**

## Bilanc finacièr.

Adoptat a l'unanimitat.

Cf documents adobats per J. S. Barria

**A faugut dos ans de recèptas per cubrir lei despènsas per la manif de Carcassona. Necessitat de faire de causidas en vista de Besièrs.**

Discutida sus la demanda de crompar una bandièra FELCO nòva e mai visibla, tant coma de comandar mai de drapèus FELCO.

Per aquò faire es necessite de cercar de mejans novèus. Se pòt pas faire sus lo budgèt previsionau ordinari.

Se parla de participar a la tenguda de la beguda, a Besièrs e de la possibilitat de i tenir un taulièr de libres, çò qu'implica un engajament militant...

**Assémat** : accepta d'estudiar la possibilitat de declarar - FELCO e CREO associats - associacions d'utilitat publica o d'interès general. Aquò nos permetriá de reçaupre de dons recuperables, per tròces, sus lei talhas.

**Rainal** fai la remarca que i a jamai agut de manif granda aperavans, e qu'aquò es una situacion novèla. Se pòt envisajar per lei CREO de faire de demandas de subvèncions de fonccionament, e non pas sonque de demandas per de projectes precis (qu'una manif pòt pas n'estre un !). An començat de lo faire a Tolosa. Aquò es a mand de capitar.

**M. J. Verny** : La FELCO manca d'argent subretot perque manca de sòcis. La FELCO a besonh de sòcis, non solament per lei sòus, mai d'en primièr, per la legitimitat venguda de la basa.

**J.S. Barria** confirma la dificultat d'encaissar leis escotisons dei CREOs.

**Se discutís de la plaça de « l'ensenhament public » dins la manif de Besièrs. Mentre que Carcassona fuguèt una manif « un pauc muda », fau qu'aquela de Besièrs siegue mai audibla. I a un projecte de veitura de sonorizacion. Faudrà donc pensar a d'eslogans. L'eslogan « Per l'occitan a l'escòla publica » per la FELCO fai l'unaimitat.**

Se fai un torn de taula per permetre ai rapresentants dei CREOs de donar de

nòvas de seis endrechs. (cf documents de preparacion de l'AG)

**M. Bonetto, per Niça** : Capitan de trabalhar de cotria ambé lo SNES e ambé l'IPR nòu qu'es G. Juniot. Lo pb es que lo ligam ambé la FELCO es pas evident per totei, vers Niça...

**C. Maury, Motpelhièr**, Lo rector, mai leu favorable a l'òc, a dich qu'a pas de podér de decision dins leis escòlas. La despartamentalizacion dei CREOs sariá una bòna causa per aquò. Lo CREO de Montpelhièr se decentraliza.

**A. Rainal, Tolosa**, nòta qu'es pas facile de destriar çò que releva de l'accion dau CREO. e de la dau Rectorat. (quand ne sarem totei lai !...)

**C. Assémat** demanda que se parlesse pas mai de « Paris », mai de « la Talvèra ».

**Regreta la manca d'un pichòt « burèu juridic » au dintre de la FELCO. Per exemple, tot lo debat neblós a l'entorn de la lei Deixonne. Abrogada ? Remplaçada ?...**

**(discutida longassa sus lo sicut).**

La realitat es que la soleta referéncia legala per lei « LR », a l'ora d'ara, es la **lei Fillon**, (ambé lo convencionament estat-region) integrada au Còde de l'Educacion en plaça de tot çò que i podíá aguer avans.

**M.C Rixte, per Grenòble**, mòstra lo contraste entre lei fòrtas potencialitats linguisticas en Droma-Ardescha, (79 escolans en seisena ai colègis de St Pau e de Peiralata, 50 a Nions) e la politica rectorala qu'aurà leu agut la peu de l'ensenhament de l'òc dins l'académia. Lo trachament de l'òc releva de la meteissa logica istorica que la politica d'eradicacion doça menada per lo Burèu deis Afaires Indians au sègle 19.

Ara MCR deu partir e demanda de laisser lo secretariat de sesilha. Es encoratjada a persegre l'ensenhament de l'òc en sud de Droma e d'ensajar de bolegar aquelei dei politcs que son localament favorables.

**Darrièra minuta** : lo CREO de Grenòble es mòrt mai la **seccion regionala de l'IEO Ròse-Aups** duèrb una comission « ensenhament », per pas laisser lei causas en pantara e ensajar de passar una convencion ambé la region. (cf PJ

**Question** : coma aquesta comission podriá estre integrada a la FELCO ?